

5563.8
3870

v.3


序記
詩辭

祭文
雜著
箴

附錄

老雲集
人





老雲文集卷之五

書

上定齋先生

丁巳

卽日冬令伏未審函丈台體節宣萬重遠慕區區無
任下誠仄聞令胤文兄有甚彌留之症想已漸到佳
境是庸仰慰之至暨一登龍門便作三十年前事三
十年前年少志毀意以爲此一事在前門戶之訐不
得不從事於此事而早晚可了則庶可以從容灑掃
於門屏尚未晚也浮沉場屋晚晚無成而不知不覺
之中如于志尚剥盡無餘蹉過了無聞之年已數年



矣於是乎更不敢進一拜又不敢率爾奉咫尺之書
自齒於門人弟子之列者竊恐無得於身心而適足
為門下之累而已槩見向道之無誠涪州還稅已有
年矣固知神明所扶道義彌光而晚營菟裘山當益
高水當益深引領南望尤倍於平昔而孤露餘生棲
屑多年遽又喪耦於前秋禍患隨至尋常書史亦不
能如意看討而只有一子亦無可教只將工令文字
看作家計如此而安得免為鄉人而已哉見今世衰
道微惟門下是恃苟未能一者陪侍以聽緒論之一
二畢竟為小人之歸甚可憂懼隣居徐君科目中人

近能回頭轉脚有意於此邊今又進拜廡下庶幾熏沐以副區區之祝

答東林李丈

著秀

尋常景仰有若師門曾不敢率然奉咫尺之書以露無蓋之拙矣不意卽日伏蒙不較先施辭旨鄭重降屈年德使人有感發興起之心此可見善與人同底至意自顧不佞何以得此於大方也日夕擎讀不妨作座右銘可感可感比日旱炎漸熾伏惟南轅餘燼次蒨蔗境晴牕佔俾爲道保重四來感冒恁地大同想不入寧淨地界否耶暨元來田地百不肖似玩愒

性情局於所處既不見就正於當世之賢人君子而
俛俛墻埴重與之出沒淪胥於規規乾沒之科如干
志尚滾到沒已鼻立得箇題目頓在面前又却低徊
前却朱子之云着矣今者執事矜憐庸愚謙已勉人
稱道太過愧汗愧汗繼自今庶幾見教熏沐芳潤容
或免小人之歸則執事之賜也鑒之幸也

答金乃錫

即因金生拜新歲書謹審蘋姑射洞天福地悅朗如
新二老仙芝眉鵲髮含飴對案令人可敬而可慕庭
有一雙鳬往來於清涼豐樂之間而騰颺輕健無異

必曰儻是仙家子弟仰首歎羨而已君子曰易中孚
之繇曰鳴鶴在陰其子和之我有好爵吾與爾縻之
常誦讀而愛慕之今公以十年山林之人得百里專
城之養其人也哉其人也哉所謂其友洪士直云者
以是爲獻賀之狀足矣而久病未果因繼之以贈言
之辭曰養親報國其義一也願公以清勤二字爲居
官之符以圖報國而又永終譽同人之望也方杜門
擁衾忽有一聲山梁帶故人鴈書而至惺然起坐使
人借讀三兩知使君之情翰惠貺數種可感可感但
老兄之手老而益纖病友之口病而益巨柰何臨川

諸賢無事還幸矣或有書面之緣可說此人之病狀
經年未脫危也餘春氣暢和身體蘊健則豈無握笑
之日乎只祝榮養萬重

答元進士

錫亨

二月廿四書承圻於暮春之初繕繕十行儘出情悃
披閱生毛常在案上古人替面之說儘不虛語卽宜
拜謝而爲村診所逐棲屑數三月始尋巢屬耳居然
秋事將半矣此時潮涸尤非平昔謹候兄體棣履鼎
休且慰且溯弟狀無可聞形貌與年俱邁忘業此貌
益衰甘作山間之樵牧老兄今爲七耄之人風致顏

髮想像如仙家之老鶴。晬日倍悲之教。安得不如是也。第念山當益高。水當益深。園林益清。趣魚鳥益情。熟兄弟鎮日相對。小友聰明強記。又令人可賀。楊花燕子之家。未知能有是也。否賢或業已勝并其成就。亦何居瓊韻奉讀。累翫類非俗士所可及也。邇來工夫。果向此理上留意耶。原詩與妻孥兄弟胄孫等語。茲各搆一律。忝拙仰呈。自笑其多見其不知量也。

與關東伯洪

祐順

士大夫平日讀聖賢書。任家國之策。而坎壈乎巖穴者。何限。嚮使假之以一命之職。庸詎無少試其學耶。

伏惟相公閣下

聖朝之喬木吾黨之景星早自少

時已擢高科登顯仕其所自期待者何如海內之士

聞下風而顙祝者又何如今

聖人在上命之以一

路之寄此闕嶺民士之幸也與其草樹魚鳥涵泳聖

澤丈夫建節古人所榮而尚未足以爲明公賀也軍

民政事號令施爲之策自在良遂知中非草茅下士

所敢效愚而闕東以山水聞於天下磅礴清淑之氣

或鍾於人則巖居川觀之士安知無所謂其人哉觀

風之餘廣采而禮羅之與子舍文兄講磨淬厲則大

君子開物成務爲國爲家之道可謂兩盡矣然士豈

易言我伏惟閣下幸裁擇焉某抱書八山忍飢課兒
無得於道無用於世獨於閣下見知既十年不念彈
冠之嫌敢此橫豎以修起居之禮伏祝相公體事萬
加珍護以副區區之望千萬

答朴釋晦

煇

即拜存札謹審先府君焚黃隔在數日感祝忻忭當
復如何世世忠孝之家天意茲衷若有神佑於其間
顧此無似猥有托名之幸向來歸事無暇外念而獨
於吾兄事耿耿若自己矣其後賢器來訪於寂寞之
濱季難邂逅於稠座之中始聞臺啣清秩已下於舊

日葵花之門詩云孝子不置永錫祚胤者可歌於兄
家將事之日也非不欲趨卽躬賀兼叙多少而未由
如許此則情勢然也何敢望見宥耶

寄鍾兒

見書後日益富雪益積未知讀書飲啖與居之節能
無所損耶中庸吾所願讀而不能多讀者汝於此已
數年矣見得吾未見以爲受用之資則何幸何幸改
苦食淡古人所戒爲父者豈不念或飢或寒而有若
忘之者然可恨然只將極辛苦不快活方有好消息
來爲吾儒家法如何士剛聞苦濕瘴今者何居梧友

年最少能去家而旅食讀得幾許可嘉其意卽今歲
除此迫勢將撤歸時招致下人輩示其殷勤爲可
此亦古人事爲及之吾棲山已久了無所學日把心
經看得數頁而已

序

九臯書院講學序

書院何爲而設也有宋諸賢盡爲講學而設也不學
則無以知爲人之道不講則無以明爲學之方矣是
以三代盛時設爲庠序學校以爲學者之依歸有如
鳥林魚水之各得其所所學者天理民彝也所講者

詩書六藝也上之人以講學爲出治之本下之人以講學爲成材之方虞夏商周之爲虞夏商周者以其有講學也秦晉隋梁之爲秦晉隋梁者以其無講學也講學之所係顧不大哉紫陽氏所以眷眷於白鹿洞書院者此也藏脩於此講學於此于以釋菜於先聖先師此書院之所由興而吾與之紹修卽白鹿古規也慎退之規模節目皆以講學爲本而講學之方不過是明人倫也求聖學也吾與之齒於嶺嶠者有以也挽近以來講學廢而數倫亂常之徒接踵駢武而委之曰財力耗矣丈席空矣講學不可爲矣於乎

財力之不贍其果講學之所崇歟藉使專廢講學則
雖財如金谷奚以爲書院哉士子之講學有如飢者
之求食農者之談耕必待伯夷之所種易牙之所調
然後可食則飢者終無可食之日也必待神農后稷
而可耕則中原好田地其將盡廢而不耕耶此不思
之甚者也前年冬只將延平答問通讀於雲院居接
之日者意有所在而今我九臯書院亦先父老講學
之地也迺者陞院之後金學士禹銖公與吾儕幾人
講讀心經數編於此而畱以爲院中故事豈不美哉
屬此丁享齋會之日後生少年彬彬多文學之士而

風聲氣習因循前例荒談俚語飽歡終日則先賢之
靈其肯曰羣賢之禮饗我乎遂與諸君講論近思錄
若干編性命之淵奧精微固難以窺測衣冠之整齊
嚴肅猶有以可像答問之際討論之間宛然如周張
程朱之儼臨乎其上也雖曰丈席在座殆非虛語也
此事亶出於買田一方之意而今秋既如是明年春
又如是秋又如是無使講學之地專委之遊嬉之場
則安知來者之無傑然倡學者耶諸君僉曰諾哉遂
歷書其語而為之序

徐聖中字序

聖中徐君在正表德也日訪余於白南之僑居作而
言曰在正曾以士剛字之蓋爲叙而祝之如古人之
爲庸代弦韋之戒善哉言乎乾之象曰天行健君子
以自強不息是贊其剛健以明聖人體道之妙也坤
之文言曰直其正也君子敬以直內是贊其正直以
明學者八德之方也既曰正而又曰剛其有見於乾
坤之義耶自聖賢道衰士之尚日趨於浮靡囂譟者
蓋久矣君賢器溫柔和易恐欠了勇進果行之氣苟
能宅心以正進德以剛則庶不負受中以生之性然
知剛之德其亦難矣孔門諸子親學聖人而猶有以

申棖之悻悻自好當之知剛者若是之難則而況於剛者之難見乎此當剛而不剛不當剛而剛俱不與於中庸者然也夫以乾之剛九三之危以其過剛而失中上九之亢以其過中而太剛也於是乎可以爲戒而未可遽以爲表德也言近乎剛則恐或有粗厲猛起之習行近乎剛則未必無矯厲亢爽之病以之在家則欠於和敬以之居世則易招乖激此乃向所云悻悻者之流之弊耶因是而奉規可乎余嘗以直字吾而所以自直者未能皆直而直之害不直少矣終不如中字之不偏不倚安穩停當而爲無弊也竊

欲改直爲中而未能也今於士剛易之以聖中云爾
則何居焉周先生之言曰聖人定之以中正仁義而
主靜君其勉之哉序則吾不能旣以是自勉且以勉
聖中云爾

記

梨陽書堂記

興治東十餘里有上登山山之陽書堂在焉堂之下
卽所謂梨木村也東曰識春塲繚堂而南至松村之
腰而止西曰細雨坡逶迤止於村之尾塢之東一麓
環翠而南停於谷口有巖石端正若摺笏因名之曰

搢笏巖其上平行可圍坐古松植立宜名以古松流水之臺坡之西山爲鳳儀山山之南岡蜿蜒蜿蜒重重拱抱回首與東麓相連層巖戴土成臺亦名以落花啼鳥之臺余於己酉之春挈家僦屋于其中村畔有梨蓋不知其幾百年村之以梨名者識其實也或曰村之脅有盤巖焉盤巖之音轉而爲梨木之釋故俗呼爲梨木者此也粵明年冬乃營是堂三年而告成遠近同志之力居多焉堂凡四架東二架通而爲堂以便講誦周旋之所軒曰蒼鷗以其鶴駕之蒼然入望也西二架分而爲二齋南曰淵冰余居之北曰

時習諸生居之種竹於西牕之外牕曰團藥牕出入
恒多於東門故東曰如見門合而扁之曰梨陽書堂
堂之前措置江城玉梅芍藥牧丹杜鵑等花山之兩
岸多散丹焉茅茨十數家稠疊眼前不遮於眺望也
循皆而下不幾武清泉瀉出於石竇深可數尺紺寒
可愛及村之閑又得冽泉如右兩泉之半竒巖特立
如人因呼之以石丈夫人金君築堂於其傍而讀書
其中稍轉而左有洪友家卽與余同入于茲山者也
堂之處勢高朗而東南諸山平穩低軟宜於遠眺第
於此山曾無清流激湍不爲無恨而兩泉盈科之水

涓涓瀼瀼可靜聽而不宜聒耳友人爲之鑿小塘於
谷口畜魚苗於其中山水之趣於是乎略備矣顧余
資器最爲魯下滾汨場屋蹉過半生今者孤露衰敗
無復四方之志矣將欲抱書入山隨分探贖做得幾
年工天而孤棲山間亦難爲計不免挈歸故里堂猶
自如也有時竹杖草鞋乘興來遊則或紅綠滿庭禽
鳥嬰鳴或林樾成陰牧笛相聞或雲烟連空類瞰如
銀海或雪月滿壑潔淨如瑤都或樵歌聞於几案或
霞氣生於衣袂或一兩日或旬月焉留之與諸生講
其所未講縱未見卓然可恃者亦不無相長者也令

人有卒歲蘆峰之願而此去人間近可五里輪鞅軍
到禾黍均豆洞府窈窕風俗淳古雖謂之閒中日月
可也若置數頃田於其間不以年老而自棄期與諸
君分寸而躋攀則庶或不負於是堂矣

淵水齋記

淵水子以淵水名其齋其友詰之曰淵水之義奚取
焉豈非曾子所引如臨深淵如履薄水之意耶曰然
然則吾子妄矣曾子亞聖也乃以戰兢臨履爲終身
之工今吾子其能有三省之工耶其能聞一貫之旨
耶其能有壁立千仞之氣耶其能有千萬吾往之勇

耶夷考其言行曾無一毫彷彿於古人而迺敢以古
聖人格論至訓顏其室而後其號有若色莊者然吾
子果妄矣淵水子聞其言凜乎若墮于深淵赧然若
朝聞命而夕飲水莫之措其躬而開其喙其友厲聲
曰吾子此一事其或可以漸進於淵水之工矣夫自
茲以往隨時隨處若大若小恒存敬畏必如今日之
聞余言而恐懼自省則庶幾可進於古人之學矣或
者徒有羨魚臨淵之情而不知春狐聽水之意則不
愧于齋乎不愧于入其齋而觀其號者乎吾子念哉
敬哉淵水子拜受而書諸卷是可爲淵水齋記耶是

歲鑿水節主翁記

聽泉庵記

聽泉子本山野人也淡乎如水隱隱乎如雲山老益拙不能與世浮沉僦矮屋梨上上泉泉上沉潛性理日求之詩書禮樂以自遣也氣倦則登高望遠暢叙衿宇其視世人之趨走利祿不翅若蠅營狗苟高蹈物外送老于茲環以細麓列以松杉楓篁棗杏層巖循階除以流山澗映帶左右逶迤灌之稻畦徑其湑以來人之之庵者其居稍深罕聞世語獨清泉噴生石竇澄然而鏡紺然而藍消日夜而映天雲流入于

枕之下洋洋焉不能定名因翻然自號曰聽泉一日
與兒子讀書庵中是夜月明風靜遂爲掩卷起坐默
然對絜有聲琮琤然轉于林薄淨淨然瀉出牕戶傾
湍觸石冷冷號號警發神思蕭颯雨如也清冷秋如
也琴如也嘯如也如竽如笙如語如吟不主而索無
韻而清曲而有節細而不斷續而不煩不調以律呂
而律呂自諧滌胃洗耳爽乎如醒大寐而遊物初噫
廓隕之間萬籟咸吹聲音之可聽者不可殫記樂其
尤也軒轅氏之咸池有虞之韶又樂之大舞魚龍儀
鳳凰感物如此在人可知孔聖聖也忘肉味於百世

之下比之空山流水淅淅細細非石非金者爲何如而不假辨論而霄壤懸然而然而自其自然觀之則此音律巧也借鍾鼓煩也操始終窮也樂則樂矣夫豈足以樂自然哉人之言曰絲不如竹竹不如肉漸近自然非惡夫樂謂其非自然也明水之尚鸞刀之貴貴其存太初也方臯之相馬超乎驪黃牡牝之外者貴天機也看一人爲處皆非自然也夫自然之中自然而聲自然而聽存太初而動天機者孰如吾聽臯耶有如春之鳥夏之雷蛩於秋而冬而風者何莫非同天廣樂世無有南郭大耳不之知耳不知聽此

而徒知聽其所聽則師曠之聰吾則以爲聾於聽也
小子聽之豈獨孺子之滄浪也兒子聽之忻然而對
曰方塘活水光影徘徊靜焉而有無極太極之妙動
焉而鳶魚飛躍之理一動一靜一聽於心則無聲之
心可以反隅於有聲之泉矣易曰山下出泉君子以
果行育德吾方聽泉而爾乃聽心之爲可樂倘所謂
聽於無聲者耶喜而爲之記

誄辭

蒙晶山權公文

並序

上之十年己未五月丁酉晶山令公卒于家

以是歲十月之丙午孝子學士君奉冠履葬
于紫蓋山之南嗚呼公卽我故說書平庵公
之胃孫也天下無義理則己天下有義理則
天下之人孰不曰先生先生也哉璧也有暮
制不敢長言以助締謹以數行蕪語再拜而
誄之曰

東人重氏族公乃平庵的昭忠定的穆南士尚義理
公乃肖於祖而盡於國儼然兼天下之達尊芳蓋公
所得於天者剛且毅身若不勝衣芳蘊於中者有千
仞壁立之氣言若不出口芳發於章者能言一世之

所共諱赫赫古家重有赫赫之行芳容貌鬚髮望之
若神仙中人歸來兮於山間坐鎮流俗之迷津千歲
兮在後必有野史者出而識名臣

謙金君釋完辭

並序

金君釋完與余爲文墨友其才余所不及爲
人哲而踈眉善談論今古又慷慨有燕趙風
慕石曼卿之爲人此皆余之所不及也於乎
吾猶及見君先大爺公公益博雅君子也卒
坎珂于世先處士趾美增光爲藝林間翹楚
而天於盛年君又世其家儘昆山之王也川

城吾黨之陸海而儕輩咸推之為前茅焉於
乎曼卿之徒出而士之喜遊者往往為藉口
夫以之子之才之器繩其身而準其路則
豈不誠吾黨之景星哉畢竟曼卿為崇客沒
於江南數百里之外此豈釋完之志哉莊周
之逍遙遊子長之壯遊衡岳之朱先生黃趾
之金剛聖賢豪傑古今江山之遊者何限此
命也命豈可責耶釋完有才而無命良可哀
也今年春余與上舍叔文君歸自長安語及
君噫然欲淚下者累矣上舍君曰子與吾釋

完友善可無一語以誅余記昔秋雨留仙庄
有和君河陽曲一章追復次之以寄哀胤莊
叟所謂無與爲質者尤可悲也噫余釋完其
辭曰

河陽何所有使君偏憐河陽多河陽之水流汨汨乘
風數去輕如檣河陽之山高峩峩連年忘却家鄉懷
應有悲歌擊劍者把手低徊未歸來山西有人天下
拙聽君嶢嶢堪垂頭任君縱橫放去朋友責思之徒
增愁增愁可奈何知君所崇河陽曲一灑平生淚新
阡綠草今宿宿

邊君

光緒癸亥辭並序

川城吾黨之淵海也讀書修身之士至今有
古昔賢輩之風徃徃說邊君颺芳善信人也
今年夏吾過海上聞君病馳徃診之高閣曠
然無人惟君露頂塊坐其氣褐然若槁木其
色蒼然若夕烟其語澁而不成其視霽而不
睛已不是久於陽界人矣第見其心凄楚在
矐曉不語而語意溢於語也吾亦不語而不
語之語君亦領之矣其夜宿于松圍燈下兩
坐娓娓及君而所幾者君善人也信人也天

之厄於其身與家亦已甚矣或者悔之於其
命壽而回遑之否乎歸後不幾月蘭報繼至
嗚呼吾與君爲姨從兄弟也其誼不輕其情
不淺客夏之行初非爲君而行而此行因與
君千古之訣則其行也孰使之然哉吾猶及
見君家三世矣厚德實行可謂當世石達家
家法而君之兄弟三人斤斤見稱於人而畢
竟無一嗣而同歸於別天天道果何猜而然
哉吾未可知也聞君以明日歸于不暘之宅
使家兒而替乃父之筋力負之哉負之柰何

無可奈何而係之以哀辭辭曰

余嘗悲夫草木之零落兮猶見其實之婀娜盈掬燕
鴻之飛別兮猶見雪瓜芹泥之餘燭此人兮孝友而
忠信獨不見一果之不會此別兮蒼茫而杳邈獨不
見雲水相逢之約華屋兮軒敞棠梓兮繞宅鏡裏雙
鬢兮悲咽曙後一星兮孤燭書史兮滿架僮指兮羅
列所以子建之詩芳千古使人而悽惻胡不少畱兮
拊摩乎長房之式穀願言深深兮其穴等等兮其封
畢竟主其墓者而有孰

祭文

孝子洪公

重明

旋門重建時告由文

代本
孫作

於祿吾宗世濟家國有美奎壁永錫蘭王公乃其緒
天姿嶷嶷家庭模範師友文學義視浮雲心專愛日
竭力承歡非豈一節禮豈婚早意何科胥王哀廢讀
陸績懷橘室不遑暇醫亦感激斲指進血靡不用極
廬墓三年叫號晨夕沾茹枯血暴虎逆跡行全德備
源一推百鉤豆盡情著存知慤睦嫻任恤忠信敬篤
時惟夫人克配貞淑甘蠶齊誠蘋藻是則泉鶴響聞
兩朝 恩渥閭表旋門爵地臺閣紫泥烏頭城西舊
屋瓶翁撰狀星湖識錄以貽後昆俾勸頽俗逮我皇

考接遑南服世翻滄桑門闕丹楹先人有言不肖銘
臆事鉅年曠財拙誠薄族從翊周適守是邑極意措
劃殫力營聳事若有待曷不感泣是庸重建聿追先
德梨花古洞草樹增色煌煌命旋虔揭載卜衿紳相
賀雲仍咸祝願言扶護永傳千億

九臯洞城隍祭文

自有洞里業有城隍千尋楠樹一片壇場村間上下
郊野中央惟神是宅歲事祈禳士安書史民樂耕桑
有赫厥靈驅除疾瘴克成科第俾賴豐穰屬茲新望
肅薦馨香鯉沉有禮懋燎有光既受神惠永賽無忘

祭晶山權公文

代婦修儒生作

忠定大節說書苦心世類之以公乃欽欽 聖祖龍
飛中弁華簪密通耿光恩渥隆深出佩符銅坐致緋
金一念闡揮四朝沉霽濟濟籲血漣漣溫音時惟我
公隻手擔任泰山鴻毛輕重誰斟天地寬仁海嶼峯
巖大義無孤沛澤同湛麟鳳郊野星斗山林繼述家
風輻湊儒襟昔我雲鬢丈席曾臨風月依舊警咳如
今吾黨運否仙馭駸駸瞻彼瓊樓列侍昭森再拜送
輶有淚沾紵伏惟尊靈庶幾居歆

祭崔進士鳳煥文

於乎人生天地之間者無非幸也同國之士何限而
公與吾有世交戚誼之綢繆此一幸也公於海吾在
白相距殆千里而公與吾相遇於十數里許此又一
幸也人之意氣文章或相上下於曠世而又幸及見
於公之世也丈夫有事於天下而或葬於燕越或葬
於周秦不可使臨穴一哭而今又哭公於穴茲亦非
一幸耶終古聖賢豪傑或不能成一名傳一詞而公
早以文詞聲於國而登于庠又能有賢器而抱諸孫
安知不爲崑山之玉耶縱不無不幸者一二而幸焉
者多幸以是慰公之靈而幸望我公之鑑右於乎秋

天寥廓丹旄翩翩繼自今文章言論筆翰聲彩不可復覩於人間世耶思之涕零於乎悲夫

祭黃進士

中敏文

於乎士生斯世一日而有一日之耻一年而有一年之耻七十有七歲浩然獨無愧殆近世惟見公而已璧也生也晚不及見公盛壯時節而獲見公亦二十年餘公文章清曠筆法奇古善諧笑絕捭異人之知不知賢與愚隨遇而善處之世以是多公公以是閱世世之知公者蓋寡而或以爲知公者想亦未盡知公也我不敢知公之爲何所爲而爲之抑將無所爲

而爲之者耶有所爲之而不得已而爲之者耶踈眉
明目瓊章繡句飄飄倚馬則飛英玉署之才耶布冠
博帶規言矩步從容儒雅則秉拂函遙之望耶攜鋤
芸苗有似乎擊壤之叟穿屐觀山有似乎樵牧之侶
潔身若處子慮患若孤臣平居和易如聞清廟之音
讀書悲壯如聞擊筑之聲其於世間得喪榮辱悲歡
欣戚無入而不自得焉於乎不知命無以為君子公
幾知命者耶同室子弟見之而未見其高後生末學
學之而難學其方於乎其必有所受也夫昔我岳翁
公之同門友也每誦師門旨訣輒道游楊諸公當時

既未及掃灑門牆今焉及門諸公亦不可復見於斯
世此後生之悲也公又何戚一盃大呌言有盡而意
有餘於乎悲夫

祭洪公贊謨文

日月忽其不淹兮繫我公之終祥峻霜適而宵零兮
黃花燠悴而落英空山寂而草宿兮猿夜號而鴉晨
降獨無伴而雲臥兮魂執執而愴悵念昔日之追隨
兮既忘年而忘形肇自隴翁而結契兮願永世而勿
替患難而相濟兮孰云吉慶之不與喜頤頤長以入
尺兮又修能之自負善談論而且好笑兮中鬱結之

輪囷順事親而友弟兄兮亦頗長於急人屢常滿於
戶外兮劍長鳴於鞘裏非齷齪之丈夫兮信傑梧之
奇士男兒志夫立揚兮夙與余而相冀龍崗書社之
團藥兮鳳山梵宮之翱翔每講義理之羣書兮或誦
辭賦之餘派朝朝瞰而夕夕月兮蠶粥松明之不厭
其苦幾多促膝而譙譚兮恒與聯袂而還往山之南
與山北兮曰吾同志之相望遵竹水之窮源兮又幾
年之鉉槩何筭瑟之不相當兮歲既晏而誰知音仰
屋而長歎兮擊劒而悲歌我爲公而寬慰兮豈知遽
有夫今宵拍叫風度兮何處焉更得來數年漳濱之

殿果兮又季難之同歸慘慘乎不可忍說兮胡禍崇
之相繼始焉吾之不能忘兮朝思暮思而夢寐而相
遇中焉此思之少衰兮風月而思文酒而思奄三載
之此迫兮奈後日之哭無地生而只爲措大兮死也
殯而無主郵四十之年光兮抑何辭之籍手男子生
於天地兮柰抹殺之公如悲思叔之終鮮芳曷以濟
夫滄海一聲吞而不吐兮羌不堪乎長辭靈昭昭其
如降兮庶幾若余尊俎

祭安公曹臨文

士有百行孝爲之源人有百福壽爲之元曷不壽考

維德之根假哉碩人大賢之昆嶷嶷其容好好其言
紆宇恢廓不清不渾孝友淳實而厚而敦昊天曰篤
俾昌其門其賦孔完其養克存隨笑快笑境過罔跟
江山故宅鄉邦達尊旣躋大耋騰跨走捷就養無方
肖子慈孫蘋茲後生仰若崑崙輿章累控至行難攀
所恃天爵倘來如捫胡不少留鸞馭無痕克荷龍光
盍若鵠原壬戌之秋辰巳之屯乘彼南極朝于帝閭
言念至此涕泗聲吞青鳥載卜白駒如奔昔我叔祖
庚友猶壩寅緣義重眷愛彌溫爰結新好朱隣陳村
公未及見恨結難噴鷄黍伴果菊釀崇樽荒辭告悃

庶賜數數

祭金公

永煜

文

於乎在昔先人之祥公爲文以酌之極道其隣比世
居之誼古今存沒之悲璧也雖無狀追念先人未嘗
不念及先人執友而公之文尚在案淚泫泫漬紙者
數矣意道公厚古篤厚康寧恭邵天必餉之以遐齡
庶幾百歲源源偵候猶見先人執友於人間世矣公
又倏焉作岱山之遊於乎悲夫公之知舊族戚之哭
公者皆以公而哭公而璧之哭公不惟哭公而哭也
於乎世之尚日以澆矣公之事行蹈武足令傳諸後

而範其家矣不毛不皮不蠟不梲居家以敦睦訓子
以勤謹與我先人隔水相望筇屨聯翩未見其欸欸
之異於人而亦未見休休之同於人嘻噫悲哉上帝
之記性不如古耶其於報施之舛何哉璧也多罪含
恤瞿梅不敢爲人作酌祭語而獨於公祭先人之意
終不敢忘于懷今於公筵几將事之前夕心聲大呼
而奠以一觴之酒伏惟尊靈哀其衷而來歆焉

祭黃命甫文

古道廢矣姻誼猶存於惟我公兮吾查尊易範古家
壽考肖孫忠厚其儀純實其言友愛彌篤如鳧如墳

鄉隣所共匪我私論少事工令傷我山樊兄曰我季
弟曰吾昆克勤克家乃立其門于彼南山有蔚林園
頭曰心赤兩家一垣有酒相酬有饌相吞暨彼諸孤
咸與推恩載履載與言笑溫溫自我連親舊誼愈敦
我往公來筇屐頻頻我惟茶茗公能盤飧公曰來來
吾弟有樽見輒詡詡留飲蹲蹲隣有耘叟君且源源
我曰唯命眷彼黷孫旣冠且學阿戎培植曷不胡福
惟孝之村公織新茲倭我僑軒公收園栗袖我諸豚
賣賣情話不盡眉痕孰無姻親公實難護公有所囑
尚稽攀援胡不久視遽歸泉原有淚沾衿有懷誰噴

臯雪者會雲燭衆喧孰知此別永返梅魂公歸不復
歲月其奔電安在卽雲日晝昏我來祭公涕泗難捫

祭洪忠叔近謨文

於乎我公棄斯世今周年于茲矣余旣不能診之於
寢病之日又不能臨之於贈啣之際茫其葬也亦未
及訣之於祖道之前此吾之所以耿耿結于懷歷時
月而未渙也夫空山兮客散日忽忽其將暮瞻彼麓
兮斜征指佳人之遺墓自茲以還西州之路不堪源
源今年春又過舊館而虛拜素帷目泫泫不能舉喉
閣閣不能語髣髴髣髴髮來就吾坐側吾亦引而置諸

滕諸君且畱之宿宿于吾書塾綠陰滿地禽鳥和鳴
或以酒來飲或提卷來閱眼中獨無吾友人豈不悲
哉豈不懷哉於乎吾於公爲三世難忘之交也昔於
先處士之喪歲飢節寒且沴氣燎原鄰里不能無危
疑吾先子承寶而大呼入告吾祖妣曰此家事如是
吾亦待下事似難入臨吾祖妣曰汝宜往哉汝於此
丈誼則先人之心友也恩則活我之父母也汝宜往
哉余時方十餘歲侍坐聞命猶認其義之如是也蓋
公王考隴隱公南寓茲土也吾王考束修而執弟子
之禮加麻於喪而遺書尚在繼而吾家家禍荐仍又

無至親之可仗而極艱危極細微事無不依靠於先
處士有若友于之弟兄家也是以公之兄弟七八年
長於先子者先子以事兄之禮事之年輩於先子者
先子以友于之誼居之自公以下三叔季與我年相
輩也每見公待來先夫人且入吾祖母床下拜見之
有若親子若侄至于弱冠之後亦不廢歲時之拜吾
祖母亦或坐受其拜矣於乎此豈可與流俗知舊見
謂等耶於乎吾於公第四兄公年齒相懸而鉛槧相
隨山寺野塾洛社驛亭每以功名相期許箴箴相推
借意以爲驥步將展附尾之蠅亦將以千里矣畢竟

中路奄忽又無嗣姓之可以道舊者而惟公在矣公之命道亦險矣公之天性亦孝友者矣公之伯仲叔季次第零落極誠彈力自喪奠祭莫至於烹飪鼓釀之微罔不親自看當以濟其艱而克勤克敏人無親與疎貴若賤皆好遇之鄰里鄉黨共稱之不置與余周旋於場屋者累矣一捷小解竟不利於禮部此命也及其晚也只有一男子而托我以教督共入白南山谷者有以也世故多舛吾亦臯馬而鵠焉朝夕追遊之樂已不似疇曩矣公以先公之遺命用盡半生之精力丹閣歸然於長咸之間公於是乎為孝子孫

矣嘗爲經理推置得如干土田又能分諸其諸姪子
公於是乎爲慈父兄矣諸女子若姪次第成就又見
其孫若從子孫者多矣公於是乎爲福老人矣庶幾
百年永享康寧之壽而備見其來許之昌大矣奈何
乎一疾值在時疹張熾之日使此平生之友抱千古
無窮之恨也悲哉悲哉吾嘗見觀察洪相公於洛下
相公曰吾思叔氏可謂可以托六尺之孤者其見知
於其宗又可見矣豈不賢哉於乎公於吾尤有至焉
我喜公喜我憂公憂憂樂與同有同同室今吾於公
負之哉負之哉公亦自茲冥然漠然此非但祭公之

文爲也將以遺之後昆也故言之盈紙而不知止於
乎公其知耶不知耶

祭宗君 晚裕文

先王有制乃立宗子宗子猶君其支疇似曷不崇之
非豈御侮於惟我公主邇吾祖吾祖在廟百世同堂
公惟年長我乃昭行折節相推許與翱翔我非尾合
公豈雷同互磨交修庶幾家風以若才資亦旣軒昂
鵬程馬肆玉佩金章企余望之匪朝伊夕命與擲揄
眷言泉石鋤苑種黍養芝滋蘭高節雙屐默視雲壑
旣康且寧宜耄宜期胡不百年宗黨攸稽孰知今歲

仙馭難攀有懷如結有淚伊潛載含載殯一哭稽遲
日月其徂窀穸有時家值憂病薄簞難具來市川魚
又窘溪雨像設有依在在溜亭我來告公先祖是聽
靈如有知剡剡來停

雜著

雙葵軒朴公

基萊

孝行旌褒上言

臣等謹按孝經曰孝德之本也教之所由生也蓋孝
為百行之源而教民親愛莫先於孝故古昔聖王崇
獎孝悌表厥宅里所以化民成俗也恭惟我朝尤
重孝理頒行五倫圖繪焉讚詠焉而烏頭棹楔在在

相望其於勸民興孝之道可謂至矣臣等竊伏見大
卹故學生臣朴基英卽 端廟朝六臣謚忠正公臣
彭年十三世孫也忠正之父 贈左贊成臣仲林及
其子生員臣珣同時殉節其後冠冕相承 贈參議
臣忠胤壬辰倡義時叅宣武之勲 贈持平臣宗祐
丙子下城後守自靖之義實爲嶺南之名家基英幼
服義方孝根天性已自學語嬉戲每以父母顏色爲
憂喜足不涉危地口不出惡言儼然有成人儀度五
歲患腰腫三朔鍼炷恐傷親心忍痛不叫號六歲其
母邁厲隨父避寓而每日至門外問起居久而不懈

其夙詣如此少治明經家貧歲險遂廢舉業專意養
親服勞憚誠多有人所不堪而父母甘蠶之供便身
之具未嘗有闕焉或遊他方及其反面則必歡笑張
舞而前詳說所經歷所聞見慰悅親心其父年高患
背疽積月沉痾精思凜綴基莢晝宵待側目不交睫
諸般方藥靡不用極凡可以娛耳目慰病懷者無不
雜進於前及秋棗方熟一枝兩歧者無風自落綠葉
朱實堪供把玩基莢取而進之病枕之側其父方在
昏瞶之中開睫視曰好矣若有鳥在枝則尤佳矣基
莢喜其父之收拾精神擬雕木爲鳥以添奇賞適有

送一瓊鳩雛者乃置兩枝之間鳩郎馴擾飲啄棲止
如素畜者棗之實葉光潤而不凋者至三朔其父因
得寓目而忘痛病情漸退遠近來見者咸以爲孝感
所致多爲圖而歌詠之瘡口久未完合常劫憂遑忽
有黃菜一葉飄轉而墜膝心有感焉攷諸醫書霜後
衆葉果是當劑遂多取斫而糝之竟致神效其遭內
艱而葬也念其母性好潔躬自負沙填之壙內嘗以
其先三世請褒事屢度上言竟蒙 恩典而鳴冤之
夕有瑞光出於其祖遺墟 命下前夕夢雙槩與門
齊高果驗兩世紅門之兆嘗爲親種蓼躬自栽培基

英死後其父有難醫之疾其二子撫蓼而泣曰此亡
父爲親而種者庶幾有效曰用蓼膏蓼盡而病蘓此
亦基英之孝推之身後而必盡其未盡者也臣等嘗
見今之言孝者輒以割股斫指之類以爲驚世動俗
之資然曾子老萊之孝可謂人倫之至而亦惟曰養
志也悅親也推此以觀則孝子之行不在高遠難行
而實在乎日用常行之間矣今基英之孝幼而謹身
跬步不忘其親養則致其力務悅親心躬親樵爨遠
追於負米棗鳩桑葉有類於夢藤遺孀瑞光門楣夢
葵感應之理捷於影響此豈非篤孝純誠之致乎其

爲先之誠事親之心無愧古人可傳青史傳曰求忠臣必於孝子之門今其英之孝可謂求之於忠臣之門也臣等同居一道常所欽慕士林僉議枚舉實蹟屢呈營邑及繡衣而尚未仰徹於 繡旒之下此臣等所齎鬱鬱也茲又相率齊籲於 清蹕之前伏乞聖明監先王之孝治體 列聖之勸孝俯循輿情亟降 綸音故學生臣朴基英施以 貲贈之典伏蒙天恩

東國沿革表

九夷之初始有神市一元之會並立檀君檀君建國

之年肇基於唐堯戊辰之曆箕子受封之歲乃在於
周武己卯之春自檀君至箕子之興一千有二百餘
歲由箕子以及箕準之敗四十世九百餘年漢惠之
時不幸甚矣衛滿之罪其有窮乎

衛滿誘箕準而奪之國

四郡

定封壇元封年間有屯藩浪荒之號二府置都督孝
昭帝時改平州東府之名赫居之新羅始於五鳳之
世溫祚之百濟起於鴻嘉之年至若朱蒙之句麗乃
在遼昭之世界神檀箕此所謂三朝鮮也羅麗濟亦
豈非三雄國哉逮夫唐之滅濟麗統於羅而暨高麗
高麗繼以統合矣東方復爲大國焉三韓氏之分封

大小各異六伽倻之建國興廢可稽金海駕洛國之
永傳四百七十載高靈大伽倻之綿籙五百二十年
江陵爲穢之都乃降於漢武春川有貊之號已自松
周時松壤在今成川之壇狝人居古悉直之地所謂
挾餘之國豈非檀君之孫扶餘羅濟合而爲一之後
神文置列郡於濟南景德定九州于境內遼沙之地
界屬中國之郡縣焉東北之邊陲爲靺鞨之部落矣
試嘗歷攷于句麗之舊土未能盡入於羅氏之封疆
其在前朝十道三京設置於成顯五道兩界更定於
肅宗岳嶺以西縮國千里而西京復歸忠烈之得於

元人可見三關之北淪沒百年而北界還屬桓祖之
破了靉城何如蓋前朝幅員西北限鴨綠之江縱不
及高句麗之境東北至先春之界反有過高句麗之
治且觀濟州地之圖古稱耽屯羅之國貢于羅服于
濟只是附庸之邦三屬元三屬麗實自教肅之世惟
我聖朝合一統而奄有分八道而惟均鍾穩會富
四鎮官漢太祖其以沛爲沐之意間茂慈虞四廢郡
周太王不以養害人之心以言都邑之美卒本九都
平壤長安等六州句麗七百有五年之基業尉禮漢
城熊川泗沌凡四府百濟六百七十年之經營耕居

則基於徐耶伐而三姓以之相傳前朝則邑于松岳
下而二京欲爲遷卜言念箕聖之定鼎卽是檀君之
古都若我漢陽則負華山而向漢江地利類崑崙之
固左闕嶺而右渤海道里有鎬京之均若言通中國
則塗山列玉帛之儀扶婁之服禹教遼東接長城之
界箕孫之畏秦威土物獻輸焉韓之內附晉室璽書
敕賜濟麗之臣服唐家仁義文錦之褒明皇寵貺於
羅主試士手札之典宋朝優待於前朝逮我聖朝
之事大愈勤幸賴皇明之扶危益力宣祖有萬
折必東之訓正廟贊一部尊周之篇聖子文孫永

保小華之綿業忠臣義士咸仰大明之遺風

先考處士府君遺事

今上十三年二月三日卽府君覽揆之辰也小子在
憂服中不勝昊天崩隕之痛追慕府君平日事行略
叙大槩以爲子孫示府君生於 正廟丁未歲越翊
年王考下世祖妣孺人教養有節自五六歲時便已
行素於先世忌辰嬉戲亦不與女子僮隸共拾棗栗
雖一兩箇心曰用之於祭需牲廉潔一物不以非義
取受學於季父處士公公方年少性急撻楚打罵律
多過度而不敢有憾慙色然亦難於進就學業矣十

餘歲遊姑叔菊軒權公

思溥

之門受論語大學等書

以羸糧之難不一年而還至老而徃徃習誦其多少

章曰吾若數年於菊翁之門庶可以從儒士之後此

乃平生之恨也十五歲冠而醮洪公

義寅

卽祖考深

交也其於醮禮洪公實帶行行過去來巖巖崖陡斷

可畏洪公使下馬徒行曰此處危險汝須慎之蓋四

十餘年未嘗騎馬過其處不肖自幼陪侍來徃於渭

陽府君誦洪公之言又曰世間奇險有其於此汝須

體余意也歲甲子移居于龍崗之陽舊廬曾經煨燼

材尾蕩委府君貧無以鳩得章奴隸若干輩入小白

深處經風雨晨夜艱闕芥屑以成堂室奉養祖妣務
盡誠力家素貧乏無以備甘旨每憂見於色出外得
美味雖小必袖進餽膳之餘猶必焙燂留貯以供祖
妣有宿崇沉淹累年府君殫誠醫藥竟至快祛祖妣
年齒漸老府君與母氏逐年蚕績以吐紬備具壽衣
服蓋吐紬世稱利地中也歲壬午丁祖妣憂喪奠祭
莫必以禮晨昏必泣血哀毀盡情不脫經帶不食菜
果三年不食肉瘦削如臬幾不能行步鄉里同慙稱
之曰孝子也承祀事雖不贍必致潔齋素與人不曾
爭鬭亦不爲俯仰但正色以遇之有不可犯色寡言

語慎喜怒鄉人之雖好戲狎者不曾以慢褻語及之
是以人亦不甚覲之而亦鮮有不愛敬者也洪公之
喪鄰人疑爲時疹而不相問府君曰是丈視我以故
人之兒吾不以先人之故人視之耶祖妣曰汝言是
也汝須徃府君承命匍匐以成其慎終之節士大夫
知其誼者咸難之先是吾家搶桑之際鹿洞李公以
孫孫看護甚至尚今有難忘處及甲乙大侵之時穀
貴斗米三百走書來急曰幸得數包米送將俟後日
報價計不則無生府君曰此家吾何忍忘吾無穀有
門內穀包吾寧債負如其言輸送之又未幾咸昌重

表從叔祖李公來曰家眷盡爲飢餓死未有可生之
路府君即又以門穀輸送之府君啖松皮菜根生受
圖活債負如積不必槩意自此家計益蕩然處之不
甚憂昌原黃公董漢夫人府君姊也只有一乳子而
夭於祖妣目下府君盡力庀治以慰祖妣之意乳兒
無以保養時不肖生才幾月使之分乳而啗之撫之
恤之靡不用極以祖妣之鍾慈猶恐有損於不肖之
養也不肖生質至魯且倦又被祖妣撫愛之隆漫不
向學府君夙夜詔教每曰吾之失學生平之恨也汝
必勤謹成就少慰此心自此非甚不得已事不曾出

入至於農圃之董亦從此而漸疎專意勸課爲事不
肖讀書則府君向案而聽之不肖誦課則府君隨而
徃視之若善誦則喜見於色若不通透則必責而撻
之徃徃至流血而府君輒對案不食或至終日日以
爲事不敢有一日放課不敢爲雜技漫戲不肖稍解
作字府君輒於田原隴畝種養楮生蠶歷多有不燭
而不肖文墨之資常使有餘一日將一匹絹以免租
稅之急而將送諸市見有黃毛十餘尾盡其錢而易
之進士徐公成烈嘗贊歎曰此只知教子不知有他
事也不肖稍稍粗識著述先生長者或稱其可教則

府君每曰渠何能乃爾不會有一言向人稱道也不
肖年既長而冠也遠近或有願附者而黃公拭漢文
學君子也府君不問俗節之如何直許以婚媾曰今
而後得汝師也在家恐撻奪於工令每使撻寺雖凶
歟窮候糗糧常繼送矣聞大坪柳令公家居講學命
不肖曰汝雖從科目亦宜從大方遊以定趨向又余
之望也不肖以命徃拜而還府君曰門戶之責甚急
汝須一晝業工待了一事然後從吾所好也自茲以
還不肖科舉之行專心佇待每及聞榜時直到竹嶺
必待的報而後乃還不肖偶得大小解額或與弟壻

縣名府君意以為庶幾遂志願不肖輩誠孝未到至
有三則而府君奄棄不肖輩哀痛隕結不知所以為
言

先妣孺人昌寧成氏記事

己酉春奉先妣几筵移寓白南村是年夏五月雨甚
終日霪淋無人對晤因念先妣事行之萬一捫淚叙
次以寓羹牆之慕耳於乎儀容極端莊言語極慈詳
針線絰織極工妙朝晝晨夜極勤敏以純廟壬戌
歸于先君子先君子早孤祖妣素多病家計寥落無
以供朝夕先妣日事桑麻紡績由來積債無不備償

許多醫藥無不了當祖妣宿祟自此快祛而先人亦
常病重症邀醫針藥凡三年先妣未嘗一解衣就寢
殫誠竭力以至蘇完莫非先妣之力也事祖妣盡孝
奉先祀以誠祖妣每言吾見賢婦以來舊病瘳去而
家道將興吾之深願遂矣不肖輩次弟生長育養之
節文墨之費勤勤孜孜不曾有一息之暇害人之言
未嘗出諸口懈惰之容未嘗見於色祖妣壽衣服手
自繭績以稱情禮皆窮家之所難辦也逮夫十餘年
大荒之餘五六次昏娶之際瓶無貯粟機無尺布艱
闕經過思之掩抑而已乙巳冬先君子奄見捐背纔

過三年氣力猶康健精神益清明至若細針纖絲錦
帛之衣皆親自縫裂於燭下見之者皆以爲百歲享
年戊申夏不肖幸得蓮榜彩衣歸侍感喜交至而獨
幸神觀筋力勝似於前不肖意以爲庶幾無恙從當
決意奉養莫追於先人餘憾或可以小售於老慈矣
天不我吊至於此境使不肖輩終抱天地難逃之罪
哀痛罔涯不知所以爲言

老雲文集卷之六

雜著

太極圖說解

無極云者無器與形也太極云者天地萬物之理無不在是也以其無氣與形而天地萬物之理無不在是故曰無極而太極所謂太極云者合天地萬物之理而一名之耳是以朱子曰周子所以謂之無極正以其無方所無形狀以爲在無物之前而未嘗不立於有物之後以爲在陰陽之外而未嘗不行乎陰陽之中以爲通貫全體無乎不在則又初無聲臭影響

之可言也正以其究竟至極無名可名故特謂之太極猶曰舉天下之至極無以加此云爾不言無極則太極同於一物而不足爲萬化根本不言太極則無極淪於空寂而不能爲萬化根本至哉言乎其曰無極非具虛空斷滅都無生物之理而如老子莊子無窮無極之謂也其曰太極非有形狀方所把作可見之物而如止極屋極可指可觀之物也然則何謂無極天地萬物之理初無形聲之可見也何謂太極天地萬物之理無不備具於這裏也太極之上非別有無極故必着而之一字以示夫無極太極之不可分

別言之也

太極動而生陽者何謂也太極本靜纔說動時已帶得氣來則生陽者乃理氣交配而生也非太極獨生之也若以這動字專屬之理一邊看則生之者亦專屬之理一邊看耶動之生之者氣也所以動之以生者理也陰陽未生之前專是太極陰陽方生之際理氣已與之配合而生得陽生得陰也然生陽之先於生陰者何也以其尊陽而卑陰耶果有陽先而陰後耶太極本靜本靜之時不消道動靜不消道動靜則無論陰與陽不成說生而氣來配理然後本靜者始

動而動處自生陽動極而靜處自生陰也既曰靜而生陰則未動之時疑若可以生陰而未動之時混是理也不合理氣說則斷不可謂生陰而理氣配合之初其必有動而動卽是陽故曰動而生陽則太極非有意於先陽而後陰也只以理配氣時動先於靜也要之易之乾坤以乾爲首乾之四德以元爲先者聖人豈以無其理而故爲之首之先之以爲假說之辭耶陽先於陰槩可見矣

一動一靜互爲其根何謂也分陰分陽兩儀立焉何謂也太極涵動靜之妙動靜爲陰陽之機則未必先

動而後靜若今日明日之有先後也今夫太陽方午之時純是陽也待到未時陽已消一分則陰之一分已根於此矣到得申酉時陽已消二三分則陰之二三分已根着於此矣至夜亦然互爲其根之句豈不是善形容處耶不可說消盡陽後方生得陰消盡陰後始生來陽也互爲根以合底說兩儀立以分開說陽變陰合而生水火木金者何謂也天之生水生木生土屬之陽地之生火生金屬之陰然水木與土非獨陽生之也陰與之生而陽之氣較多曰火曰金非獨陰生之也陽與之生而陰之氣較多故曰陽變陰

合以明夫陰陽變化交合而生之也

五氣順布四時行焉何謂也木爲春而水生火火爲夏而火生土土寄旺而生金金爲秋而生水水爲冬而生木又爲周流無窮

五行一陰陽也陰陽一太極也太極本無極也何謂也此從出處推上去也五行所從出非陰陽乎陰陽所從出非太極乎以其具萬理而無形器故曰太極本無極也

五行之生也各一其性何謂也性卽理也理卽太極也所謂各具一太極也

無極之真二五之精妙合而凝何謂也真以理言精以氣言真之義也可見無極之爲真實無妄也精猶言百物之精也可見太極之不雜乎二五也無極二五之真精妙合自然凝成此以氣化者言之也

乾道成男坤道成女何謂也以氣言則陰陽以理言則乾坤若曰陽氣成男陰氣成女則自與理不相干而必曰乾坤然後乃可見理與氣合而自然成之之妙也道只是形而上者之道男女只是形而下者之器而這道字當以一陰一陽之謂道之道字看

二氣交感化生萬物萬物生生而變化無窮焉何謂

也二氣云者男女之氣耶陰陽之氣耶男女之氣卽陰陽之氣而但至此較多男女之氣上說待到萬物生生而變化焉則無極太極陰陽五行氣化形化無所不化

惟人也得其秀而最靈何謂也秀與靈就氣上說而得其氣之秀而靈則秀與靈處自有是純粹至善之性也是所謂太極也

形既生矣神叢知矣何謂也形形質也神神氣也陽動陰靜而形質既成神氣發生似不可分屬陰陽然分明是形生於陰神叢於陽而陽善陰惡

五性感動而善惡分萬事出何謂也形既生矣而五性感動於形氣則是觸外而感者也神發知矣而五性感動於知覺則是由內而感者也有如耳目口鼻之欲未必皆善惻隱羞惡之心可以爲善故曰善惡分萬事出矣五性感動卽生五行之象也善惡分卽成男成女之象也萬事出卽萬物化生之象也

聖人定之以中正仁義而主靜立人極焉何謂也中正仁義人生固有五常之性則不待聖人定之之後有之而惟聖罔念作狂故必以中正仁義定之然後善惡之分而不定者定而爲純善矣萬事之出而不

一者定而爲一歟耳。定如安而行之之義。程子定性之論。未必不原於此。不言禮智而言中正。或曰此圖本爲發明易道。故但言中正云。亦不知是如何。但中正二字較有力。此是先儒定論。不敢立異而強解。主靜乃太極之本體也。主敬之工夫也。太極本靜而爲太極。則聖人之主靜。豈不爲人極乎。主靜云者。已不是偏於靜也。涵動靜而但以靜爲主耳。然主靜非爲立人極也。上包了中正仁義。然後乃可見太極之全體。若以太極專主於靜而不能動。則何以生陰陽乎。何以生五行乎。又何以生萬物乎。主字當深著看。

聖人與天地合其德日月合其明四時合其序鬼神
合其吉凶何謂也言聖人不假修爲而自有得乎太
極之全體與天地混合無間矣

君子未至乎聖人者也小人不知有此理者也修之
者修其固有之性也悖之者悖其本然之性也修之
而爲君子則不亦吉乎悖之而爲小人則不亦凶乎
吉凶不專以禍福論也易以吉凶言者蓋多

天地人之道皆指理而言歟指氣而言歟或言理或
言氣歟兼理氣而言歟若曰指理而言則陰與陽柔
與剛皆氣也若曰指氣而言則三箇道字皆理也人

之道曰仁與義恐是專言理而同言天地人之道不應立言之有異同也然則陰與陽之理乃天之道也柔與剛之理乃地之道也仁與義之理乃人之道而兼理氣該體用而言之耶

原始反終故知死生之說何謂也由無極而至於生萬物此非原始乎從生萬物止推去本無極此非反終耶原始則知生之道反終則知死之道耳

大哉易也斯其至矣何謂也此圖卽易有太極之義而推明之也大哉之意不但原始反終之故也自聖人天地合德以下至死生之說統之爲大哉之義也

大哉之大卽太極之太字也至矣之至字卽至極之意而非太極之極之義耶

圖之左旁書陰靜右旁書陽動者何也若以東西言之則東爲陽西爲陰而若以左右言之則右爲陽動之方左爲陰靜之方也或曰圖卽象天而仰觀者也試如其言則東西擲面東刻果爲陽動西旁爲陰靜豈不妙哉其下乾坤男女圈亦如是

天一生水而置水圈於陰靜之下地二生火而置火圈於陽動之下金木圈又易者可見陰陽之交易化生之妙

無極太極二氣五行合為乾坤健順之德而成男成女則此乃生物有形之始也未有生之者而自然成形故下一成字以別於形化

圖與說蓋濂溪周子手書與程子而未嘗說與人其意以為非程子無可授者程子受之而未嘗說與人其意以為不敢受之亦無可與道者於乎圖何敢言說何敢言哉

西銘辭

上段

易師卦大君有命大君指天子○胞生兒褻也小弁註獨不處母之胞胎手

肖字韻會云骨肉相似漢刑法志人肖天地之貌

乾稱父坤稱母者所以明萬殊之一本也乾道至健而位乎上有萬物資始之妙父道也坤道至順而位乎下有萬物資生之功母道也然則不曰乾爲父坤爲母而必着稱字何也曰此以分殊處說故著之稱字而稱父稱母之中自有各父其父各母其母底意若以乾坤直爲父母則恐或無不父其父不母其母者乎不以乾坤稱爲父母則何以見民吾同胞物吾與也底意乎旣以乾坤稱父母則我固是乾坤之子而天地之氣是吾所受之體也天地之理是吾所賦之性也物吾與以上以並生之仁言之顛連而無告

以上以推行之仁言之同胞吾與之分固有民物之分殊而同胞之中已含有分殊之意大君宗子家相之分固自有君臣分殊而又可見宗支之分殊矣又可見各安其位各稱其職親疎尊卑等位嚴截井井有不可犯之意尊高年慈孤弱長幼之分殊斯可見矣然高年在人其長在我孤弱在彼其幼在此亦豈無人己彼此之差等乎聖其合德者乃天地之聖子也賢其秀也者乃天地之賢子也天地本豈欲分殊於聖賢父母亦豈有偏愛於兄弟乎同一天地之性而有性之反之之分同一父母之子而有克肖不肖

之別者非天地父母之心也乃人子自修之如何耳
下段所謂知化窮神非聖之合德乎無忝匪懈非贊
之秀也耶舜禹會三條就聖一邊說顓申竒三條從
賢一邊說聖賢之心卽天地生物之心也父母愛子
之心也是以天下之疲癯殘疾惻獨鰥寡皆吾兄弟
之顛連而無告云者曷嘗無其理而假設爲張大耶
始曰民吾同胞終曰皆吾兄弟同胞者兄弟之謂而
兄弟者同胞之意也此與中庸始言一理末合一理
之義相爲表裏而不過是盡人倫而已何以言之予
茲藐焉丁寧是乾坤父母之子則父子之倫也大君

大臣君臣之倫也乾父坤母夫婦之倫也吾與者儕輩之義而天下兄弟實兼朋友之倫高年孤弱正是長幼之倫而五倫於斯盡矣其曰聖人人倫之至者非耶盡倫之道惡乎始曰孝者百行之源也故下段專就人子事親上說去

下段

在傳渾敦窮奇禿杻三族皆不才子世濟其凶增其惡名詩王欲王汝是用大諫

以天地萬物為一體而不言用工下手之處則窮高極遠而恐於道無補也故下段歷言人子事親之道以明事天之如事親也自于時保之至匪懈反覆言盡道不盡道之分自惡省酒至伯奇引古人以實其

語蓋人生於天地盡道以事天地然後方是箇人子
生於父母盡道以事父母然後方是箇子也橫渠文
字功實有味段段必引人子事親之語而結之翼之
一字原於以燕翼子之意而匪懈字尤爲妙詩云
夙夜不懈以事一人孝經又曰夙夜匪懈以事一人
卿大夫之孝也舜禹曾顓甲竒其地位人品不啻天
地之迥絕疑若不可謂各盡其道也然退溪先生曰
當初張子非謂此等人盡道特借其事以說事天入
分上而言則當作盡其道說不應與舜禹分別人品
以不盡道義和泥帶水說了然則林隱之並着於盡

道園上不須疑矣末段是工夫而富貴福澤貧賤憂
憾復從天理上說去者何也曰立心須要如此箇中
方有大工夫在若孔子所謂貧而樂富而好禮子貢
所謂貧而無諂富而無驕者也篇中九箇吾字可以
見萬物之備於吾而恰好充足無一毫求諸人底意

東銘解

戲言戲動之害必至於長傲過言過動之害必至於
遂非而長傲者必遂非遂非者必長傲然此有故失
之別戲言戲動則故而曰不故者也過言過動則不
故而曰故者也以此看得則遂非之害爲尤甚此亦

如西銘上下段之基盤下基上段似是泛論下段似是證舉

訂頑啟愚辭

頑仁之反也愚智之反也訂頑論仁故着頑字啟愚論智故着愚字訂證也似是看訂底意啟針也似是針灸底意訂有攻治之意啟有開發之意頑者當攻而後成愚者當開而後明伊川以爲是起爭端改之爲東銘西銘蓋以爲目世人以頑愚恐起爭端又有一義二銘文義奧博後學之揆贖者恐起爭端兩說並存之不妨

小學圖後小說

學以小名對大學說也由小學而培根達支德崇業
廣則斯爲大人之學也是以朱先生必以窮理修身
斯學之大等語歷叙於題辭中以示小學大學相待
而成底意今按是圖不過曰立教曰明倫曰敬身而
已而又推其說以稽古人之立教明倫敬身而采其
嘉言以廣之掇其善行而實之小子之學必須教之
然後可以知爲學之方故首揭立教而教之之道只
是明人倫故明倫次之立教也明倫也要不外乎敬
身故敬身次之孟子曰修孰爲大修身爲大中庸以

修身為九經之本則敬身一闕為小學之樞紐而敬
又聖學之成始成終者也所以大學一篇以敬為主
向所云相待而成退溪之訓豈欺我哉然而弟子之
職行有餘力必須學文以考古人成法也故此又稽
古嘉言善行之為次序者然也正如西銘下段引崇
伯子以下以實其事之意也於乎吾輩亦嘗學小學
云者也回顧一生所得者章句而已口耳而已無一
有補於身心徒抱白紛之歎歲月之已逝固不可得
以復追終無可由之路而為小人之歸我盍於大學
或問論敬之一字而求之也

大學圖後說

大學一書有本末有體用有體用之標的有知行焉
有推行焉有始終有工夫有工效焉今以圖考之明
明德爲本爲體新民爲末爲用止至善爲明德新民
體用之標的格物致知知底事明明德之求知至善
之所在也誠意正心修身行底事明明德之求得止
至善之事齊家治國平天下新民之求得止至善之
事自格物至平天下以工夫言之物格知至明明德
之已知至善之所在意識心正身修明明德之已得
止至善之序家齊國治天下平新民之得止至善之

序自物格至天下平以功效言之知止爲始而明明
德新民之知至善所在之效也定靜安慮四者自知
止至能得之脉絡皆以效言之能得爲終而明明德
新民皆得止於至善也夫三綱領約而盡之而又益
之以八條目經一章備矣而又係之以傳十章程朱
氏作而猶恐後學之不得其旨旣又爲之次其簡編
發其歸趣而猶或有未盡又有如格致諸條等文字
又有章句焉又有或問焉諸儒又有註疏焉至我國
初陽村權先生又爲之作圖三綱八條體用本末知
行始終工夫功效宛然在目有如河圖之復出退陶

夫子又爲之劄子並與聖學諸圖獻之於穆陵之世眷眷乎作聖出治之要蓋自孔曾爲後學闡斯道其心一也如欲求之則經在茲傳在茲章句或問又在先儒註疏又如彼其詳且盡矣圖又如日星之麗天孟子曰道若大路然人病不求耳

白鹿洞規解

白鹿洞規者朱先生揭示書院學者者也學者之事豈不是千條萬緒教者之事豈不是千言萬語朱先生不過曰父子君臣夫婦長幼朋友之倫而已推其學之之序亦只是博學審問慎思明辨篤行而已則

不亦淺近乎哉而只爲初學者設耶今夫五倫之目
雖蒙生小子頗能習誦之博學等五者俗儒世士亦
未有不知之者洞規之云云者非謂知之難而眞知
之爲難眞知之非難而知之而行之爲難行之而至
於恰好處爲尤難耳先生之意豈欲使學者徒爲口
耳誦說之資耶古之爲學不過如斯而已卽從眞實
平平地頭移步去非若異端之驚於虛遠萍蒼之際
而無着手地也是以子夏以文學名而其言曰賢賢
易色事父母能竭其力事君能致其身雖曰未學吾
必謂學矣孟子曰三代之學皆所以明人倫也洪範

是何等大經綸何等大字而總之彛倫言之五教之目淺言之則初學之事極言之則聖人之事亦不過是而博學等五者又可見知行之兼該而箇中有無限大工夫在卽此五者而學焉則高而爲聖賢下而爲善士皆可以得之於此矣願與諸子試從事於斯語

博學審問慎思明辨篤行是窮理之要而大學之格物致知文言之學聚問辨是也篤行二字包修身處事接物之要之蓋欲使學者講明義理以修其身推以及人故槩就其根本田地上說未說至道之全

體然而只從博學以下以致知從篤行以下以力行
焉勉勉循循焉則所謂徹上徹下成始成終而道之
全體其在斯乎其在斯乎

言忠信行篤敬固是在我當爲的事而亦處世容身
之妙訣

忿不可懲乎忿而不懲則亡身敗家容易在一朝而
忿而懲之則水流雲飛天下都無事不亦善乎不亦
善乎慾不可窒乎慾而不窒則如秦如楚無有窮已
縱使如慾一戰勝齊非君子之事而況有命斷不可
如其慾乎遷善改過乃學者第一奇特事也善非不

知而遷之爲難過或自知而改之爲難然則善固終
不可遷而過固終不可改乎果使好善如好色遷之
必不難知過如惡臭則改之必不難噫吾輩終是知
字上透不去

正其義不謀其利明其道不計其功董子此言本以
君子心術精微處言之未說到衆人陷溺處則所謂
利字豈以和義之利看了不可作貪慾之利看了而
這謀字亦只是有所爲底意而非爲營求之謀也有
所爲云者只是少有意向之謂也

已所不欲勿施於人爲仁之方行有不得反求諸已

爲仁之功益親切有據須將西銘看久久自然見得此意思也

心統性情圖說

兼理氣通動靜該體用者心也知此則心統性情之義不待多言而可知矣林隱程氏於圖只言惻隱羞惡等情不言喜怒哀懼等情而於說則乃先以七情言之而其下直以惻隱等四者承之林隱之意只以情上言之則四端固情也七情亦情也故混淪言之而不曾論四七之辨也亦不論善不善

中圖專就善一邊說其爲圖惻隱等四者在內圈喜

怒等七者在外邊微示理發氣發之分耳心性圈內
圖仁義禮智而書仁字於左旁書義字於右旁禮止
智南位置不合何也蓋心性以入身上說也今以此
圖倒貼我心胷上從外觀其位置則方覺得方位之
穩當矣

下圖最爲詳備可以見如此爲本然之性如此爲氣
質之性此爲四端此爲七情此是理義此是氣象次
第條理井井不紊政所謂盡出天理者也今按圖究
玩庶幾用工之有着手地非李先生其孰能與於此

仁說圖解

朱先生嘗語仁以心之德愛之理此專就人身上說
而今曰天地生物之心者移一步推仁之原而說也
不曰天地生物之心則無以見仁之全體至大至廣
之妙不曰人之所得以爲心則無以見仁之在我由
已不由人之意矣然心者合理氣說也理固是仁而
氣亦可得以言仁耶偏言氣則氣未必專屬仁而合
理氣說則理之純善處氣亦與之純善今夫春生萬
物之際理與氣合而氤氲坎圪理亦生物之心也氣
亦生物之心也有如堯舜率天下以仁而民從之則
天地生物之時理固是仁也氣亦從而仁也是以四

端理發而氣隨之而惻隱之心分明是仁則氣亦可
以言仁斯可見矣天人性命之際體用動靜之間涵
育渾全周流貫徹無所不統無所不通則此非偏言
之仁也即全體之仁也仁之在我其體甚大其用甚
廣朱子此說正與橫渠西銘同其體用西銘是爲仁
工夫而首之以乾坤性命之原仁說是論仁體段而
本之以天地生物之心則於乎仁固在人人自不爲
爲之人亦天地不爲人而非人也爲之道不過曰
公也愛也孝悌也而已定性書曰廓然而大公物來
而順應此所謂公者體仁之意也有曰仁主於愛而

愛莫大於愛親有子曰孝悌也者爲仁之本西銘旣是爲仁之道而旣以事親之道段段提說如欲爲仁蓋就西銘一圖而玩之則所謂公則仁仁則愛孝悌與恕與知覺皆有著手處耳

敬齋箴圖後小叙

朱先生歿已千年矣巍然後生生海東萬里之外一足獨不及武夷隱屏之間一聽棹歌數聲爲平生之恨而況於儀刑警咳之邈然徒抱高山景行之思而已今寓寄山谷間晝永若歲室靜如淵尋常只將聖學十圖逐日課程隨力翫償合下田地滅裂旣無浸

淹之工又無明師賢友以爲之講磨於乎恐終無以
窺得一斑也夫讀到敬齋箴百回觀贖一心傾慕先
看其銘且看其圖自然使人歛衽而起敬今日如是
明日又如是積日如是之後動靜表裏之際弗違交
正之方宛然如先生之在目也正衣冠尊瞻視先生
之儀刑也足容重手容恭與夫出門承事戰兢洞屬
分明是吾先生七分影也主一無適之教須臾毫釐
之戒丁寧詔教不啻若聲響之親聽雖曰先生在茲
可也繼自今庶幾竭盡駑力願爲朱先生弟子足矣

太極圖疑辨

太極圖右邊書陰靜左邊書陽動曾疑謂左爲陽動
之方右爲陰靜之方也久久看來看去恐未恰好益
非分書也乃橫書也然則當讀以陰陽動靜而不可
以陰靜陽動讀之也是以右邊爲陽而東方非陽生
之方乎左邊爲陰而西方非陰生之方乎然則右二
黑中一白爲陽左二白中一黑爲陰爲兩儀故說曰
兩儀立焉者是也若以右二黑並左一黑爲三陰以
右一白並左二白爲三陽則不啻兩儀又不啻四象
直與乾坤六爻無異恐非先生本意若以橫書爲立
異云則第就本圖左旁註中○本體之下仔細看玩

則先說○者陰之根云者丁寧是右邊白處說也此豈非陽動乎然後陰陽動靜字之橫書者可謂的破無餘矣姑書之以俟知者

太極圖疑辨後跋

余作此辨有年矣後因讀河圖洛書諸說潛究其象不覺儻然遂作而言曰河洛之象皆以小陽三點置之左旁此蓋圖書之位自北為主而觀者亦由北而觀之則左旁爲右也爲右則右實非東方陽動之鄉耶然則極圖原於河洛而左邊書陽動者只以自北而觀之故也不是左爲陽動之方也又不是以西爲

左也實指右也指東也右邊之書陰靜左邊之書陽動者不待多辨而無疑矣是以退老先生其於天命圖說中詳之盡取而善讀之

心學圖辨

余借人心經而讀之轉轉借人本不知爲誰家丹子也就觀心學圖下細書栗谷之說曰大人心乃聖人之心是不動心從心之類何以置之道心之前本心則雖愚者亦有若大人心則乃盡其工夫極其功幾能全本心者豈不可用工而自有耶且以過人欲存天理分兩邊工夫已爲未安其工夫次第亦失其序

心在與心思易置慎獨克復心在之下置求放心爲
失序正心是行而屬乎省察未安盡心是知而屬乎
涵養未安此蓋栗谷所以徃復於陶山者也嘗見退
陶答栗谷書曰使程氏爲之言曰欲全其道心者必
先有大人欲其有大人之心者必先得其本心又曰
欲求放心者必先要心在欲要心在者必耍克復云
爾則叔獻如是出氣力攻辨而欲去之可也今其說
止於云云則豈盡以用工之次一一分先後如叔獻
所政者耶其心圖上下六箇心只謂聖賢說心各有
所指有如此者云云安有工夫之可分先後耶故程

氏自說止如此未嘗及於工夫功效先後之說今來
諭云云豈不為程氏所笑耶作圖之勢有不得不然
者非謂如大學條目之有工程先後也故程氏之說
但舉慎獨以下為過人欲工夫而終之以不動心戒
懼以下為存天理工夫而終之以從心而已何嘗曰
欲為某者必先為某或先由某而後至某耶未放心
之在第四此中亦有訛謬然若將此句只作沉沉粗
粗為學者始初路頭一番過關過此以後都作筌蹄
看不與於精底工夫則不可始之固在此終之亦以
此程氏叙次之意也叔獻前後論辨每把先儒說先

尋其不是處務加貶斥云云於乎後生末學何敢與
論於圖書而世儒或有但見栗谷書不見退陶書則
未必不以程氏爲非而以栗谷爲是信手細書如此
冊者亦將有之矣於是乎略取退書而以爲辨云甫

警學

余今四十有九歲矣日讀古人書非甚不得已事不
敢廢書丹任倦怠而屬此衰暮學不加進要之志不
篤而無所入也壬子季冬之六日大雪終晝方欲病
卧猶閱朱子大全謾記中有釋氏清草堂者有名叢
林間其始學時苦無所入有告之者曰子不見猶之

捕鼠乎四足掘地首尾一氣目睛不瞬心無他念惟其不動動則鼠無所逃矣清用其言乃有所八朱子曰彼之所學雖與吾異其所以得之者則無彼此之殊學者宜以是而自警也噫士君子爲學獨不如一叢林者徒耶勿以年老而或怠專精篤志有如猫之捕鼠則安知不爲此邊人哉因書以自警

箴

訓子六箴

辛亥歲除塊坐山社悵然有歲暮窮廬之感
回顧平生悟旣往之莫追懼其終之亦已遂

作訓子六箴以授鍾兒第一一章統言戒懼之意第二章言事親之意第三章言居室之意第四章言師友交遊之道第五章言言行第六章言讀書汝其念哉

天高地遠無窮者慈愛汝漸大懼汝漸凝瞻彼日月其疾如馳我作箴語毋敢或墮

右言戒懼

事親多節以順爲先父無師道恭敬周旋母曰細微敢以自專幹母尤難就觀盍二視爾諸父每念理義

右言事親

夫婦之間實難處正情昵所牽威儀易病勿任其情
勿激其性勉以勤密示以孝敬肅慎爾躬壽福來併

右言居室

以天子尊猶然尚齒敢曰吾曹不恭敬止必就有道
事之如親朋友講習先勅其身念昔平仲善與交人

右言師友交遊

汝言必謹汝行必危毫忽罔念悔吝莫追快言恣行
鮮有不癡我無可教汝觀近思汝有令譽我永有辭

右言言行

讀書有道博之約之深味其味可以忘飢聖賢在此

功業在茲曷不勉勉恐失其時無若汝父老矣窮居

右言讀書

自警箴

辛亥除夕旣作訓子箴壬子元日又作自警

箴凡八章章八句

五十無聞其終也已聖賢有訓豈欺我爾血氣將衰
志業亦時以之甘心曷不甚耻

在昔武公九十有五猶加箴儆風聞終古汝無曰老
尚可勉勵從今其始四十六歲

早起冠服進拜祠廟肅躬入內雖雖言笑戒勿乖和

戒勿惰弛其身不正妻子何視

還坐几案淨對書史洞視今古深揆義理操存省察
戰兢臨履日有課程以盡餘齒

教誨爾子無敢作輟心傳口授左提右挈有如師弟
互相起發其志欲大其言欲訥

愛爾諸弟貴在其兄善爾宗黨道達其情朋友有善
誠心好之俯仰無愧心曠神怡

出八要罕耕稼要務憫汝迂濶繁養誰具必謹租稅
以備需用勤勞是福宴安是恐

事無巨細必思古人古人在卷警咳如親日積月累

豈無其臻儼守此箴抑戒與隣

知非八箴

今年元日余任自儼八箴以爲勅身補過之
計忽忽已除夕點檢心身不見有銖兩之追
而頽憊抑又甚焉箴之意果安在哉莊周曰
伯玉行年五十而知四十九年之非於乎伯
玉獨何人晚年進德如恐不及一日而勝似
一日一年而勝似一年畢竟六十而化則縱
余無似聰明日淺筋力日退庶不駁以年老
而或怠隨分着力日讀聖賢書以性理爲宗

飯以講習爲活計以言乎一日則夙焉而必
念今日之寡其過夕焉而必念今日之果能
寡其過日日如是又日必如是而以言乎一
月則必念是月之所爲果有進於前日些有
所進則因其所進而求欲更進須如上灘之
艇猶恐或退痛自刻勵隨日劄記待到明年
之除夕又復點檢庶或有分寸躋攀不似今
年之依舊技倆則豈非所謂知非底工夫豈
不是化之之基本亦豈非聖賢無限道道之
法耶自知其非非一非二德性欠溫和威儀

久莊重辭令患遲蔓工業無課程教子無嚴
督治家無規模未盡享於隣比猶未謹於祖
稅者此其非之最切要者也遂作知非八箴
而爲之序云爾

念爾德性必懋溫和天地生物絪縕若何

右德性

念爾威儀必要莊重瞻彼泰華既靜且羣

右威儀

念爾辭令必戒遲蔓聽者既厭窮則斯道

右辭令

念甫工業必嚴程課汗漫優泛作輟恒多

右工業

念甫教子柰不嚴督必琢必磨愛之如玉

右教子

念爾治家柰無規模幽歌七月盍諭妻孥

右治家

念爾鄰比無敢生謨自我先施物與同春

右鄰比

念爾租稅無敢慢期不惟畏法分職攸宜

右租稅

識

大耄安公

胃臨

遺事後識

追陶李先生嘗論小白之勝而歎竹溪諸安赫赫相望其意蓋曰安氏之氏於興州者屹然與小白相上下也曰取安持憲致默君所撰次大耄安公遺事而觀之於乎偉哉尚矣文成公非後生末學所敢議到而有曰文順曰文淑曰文惠曰景質曰判書曰郡事曰副司直曰國子生曰教官曰僉中曰叅議曰執義諸公學問也政事也勲業也文章也節義也清白也巨賢名儒接踵駢武有聲於家國要之皆原於孝也

執義以後世有隱德潛光逮夫大耋公承家學之緒
稟天質之美一生事行盡從孝字上做來不曰有愉
色者必有和氣乎吾見公之辭氣滿面是和氣曠然
坦夷無表襮捭異底意其所養槩可知矣平坎壈乎
野得年八十九而病終于家及其塋也數郡之士聞
而會者蓋于于焉有以爲公孝子也長德也其塋也
宜以士林之禮余以藐然末進敢獻言於座曰此禮
甚鄭重又非公韜晦之意事遂止然尚令人發汗愧
懼矣吾聞之公之養親有泉魚日長之異侍疾有血
指回甦之感省墓有猛獸屏跡之事而今其遺事並

闕焉何哉意者持憲君於公爲宗人也懼夫一毫
放溢美而故略之耶何其安氏之多賢也其孝子元
璣氏儼然憂服今七十二歲矣深懼至行之湮沒以
遺事來示璧也何敢當是寄曰略叙平日慕用之意
云爾

東園蓮桂案識

東園之有蓮桂案盒追前輩遺意也昔我上舍龜川

徐公嘗留意於此事今其二蘇

存愚在懋

以璧亦嘗與聞

其事相與講修是帖而以遺來許不亦善乎追先志
孝也啓後進仁也遂欣慰書之于卷端

附錄

行狀

公諱璧字士直自號老雲翁洪氏系出南陽始祖
高麗金吾衛別將同正諱先幸我朝有諱瀚吏
部右侍郎有文章能直諫燕山戊午坐史事杖流
道卒子胤昌內贍寺判官子昱掌苑署別提 贈
益寧府院君子可臣號晚全以德行文學重於

昭敬世歷臺憲至大秋官嘗牧洪州以清難元勲
封寧原君卒 贈右議政謚文莊子榮庶尹 贈
吏判子宇定號杜谷光海朝坐海州獄配處八年

長陵改玉後得昭釋因韜晦以遺逸薦 持除大

君師傳不應丙子斥和入太白山屢徵至水曹郎

皆不起卒 贈吏判謚介節子允 贈左承旨生

諱游聖是爲君五世祖也高祖諱儋有文學早卒

曾祖諱得全祖諱邁考諱始潤妣昌寧成氏清白

吏以性之後彥格之女也有女士行君生于 純

廟甲子天資篤厚氣宇和粹早從定齋柳叅判致

明學好讀書於性命理氣之辨毫分縷析丁亥姜

松西樗以紹修洞主與諸生講學于本院公以中

庸旨義隨章問答累蒙獎詔金文泉熙紹嘗以詩

勸勉之曰攝心須靜坐進學在深思公書諸紳兼
事舉業承順志也與仲氏壘齊名塲屋戊申增廣
始升司馬是歲丁母憂衰經泣血三年終制一如
丙午之外艱自是益無世念俯讀仰思日與村秀
講論經義佳時吉日相與吟弄於林泉之間案上
常有心經近思錄士類之薰陶成就多出其門以
乙丑正月二十七日考終于寢葬家後龍崗癸丑
之原遺詩文若干藏于家配昌原黃氏拭漢女吏
判士佑之後也子男鍾厚早卒孫男晉裕復裕益
裕於乎公之八世祖庶尹公是我先世祖岳麓公

之女婿也君於我同列而謂我長七年兄事之我亦弟視之無間同氣入洛則必先訪我宿宿而討論經傳以相樂也今已作千古何可忘也君之從子稷厚列君之世系及事蹟請余狀其行誼不可辭遂於邑而書焉正憲大夫吏曹判書兼知經筵春秋館義禁府事同知成均館事弘文館提學藝文館提學五衛都摠府副摠管經筵日講官陽川許傳瑛

墓碣銘

並序

公諱璽字士宜號老雲姓洪氏系出南陽高麗金

吾同正先幸其上祖也八 本朝有諱瀚官吏議

燕山戊午以直諫杖流道卒二世至諱昱官別提

贈益寧府院君生諱可臣有德行文學歷臺憲至

大秋官嘗牧洪陽以清難元勲封寧原君 贈君

議政諡文莊號晚全生諱榮漢城少尹 贈吏曹

判書生諱宇定以清名直節聞 仁廟擢拜大君

師傅不就丙難避地八太白山以終 贈吏曹判

書諡介節卽世所稱杜谷先生是也生諱允 贈

左承旨生諱游聖有經行於公爲五世高祖諱儋

曾祖諱得全祖諱邁考諱始潤妣昌寧成氏清白

吏以性後彥格女以 仁陵甲子五月十四日生
公於九臬里第姿稟敦厚氣像從容性至孝不離
親側家勢雖貧窶而甘旨奉養無闕遺與三弟友
愛隆摯待宗族情誼周洽早從定齋柳先生學博
涉經傳子集日必晨興盥櫛對案究隲肩背竦直
教子侄以孝悌爲本或有過失必嚴加警責每曰
吾家以儒素世傳慎勿墜失也平日用工在四子
書於性命理氣之原無不研究勘覈一時名碩皆
推詡之遠近探賂之士咸問難而質疑焉丁亥姜
松西公設講會於紹修書院公以弱冠讀中庸遂

章問答累蒙嘉獎文泉金公又以詩勸勉之公以
是書紳而服膺焉丙午丁先公憂持制甚嚴情文
俱備飭治舉業戊申始登司馬尋又丁先妣憂喪
祭一如前喪自是無復有進取意每書室于梨陽
左圖右書日與村秀討論經旨時以山中野服合
侶嘯詠翛然有出塵之想董率一方隨材成就以
至功令文字亦主理勝黜其奇僻案上常有心近
二書若夫東西銘敬齋箴太極圖說皆朝夕諷誦
者也以乙丑正月二十七日考終于寢四月二十
五日塋龍崗癸坐原配昌原黃氏吏判士佑之後

武漢女生一男鍾厚生三男晉裕復裕益裕余荷
公知四十年得公於言議風範之間者若朝暮然
日公之從子稷亨撰公遺事一道請珉石之銘則
不敢辭係之銘曰

案上羣賢進修之志益專也山間數掾聲利之心
莫牽也允爲名祖之令孫而不負賢師之法門也
龍山之原有崇四尺銘以貞之用示千億嘉善大
夫吏曹叅判兼同知 經筵義禁府春秋館成均
館事韓山李敦禹撰

輓詞

金駢獻

公彥歸時淚未寄存亡人事兩茫然惜君鶴野聞
天響伊作鵝山擲路邊大斷元來稀合耳初心豈
止小成焉瑤宮近日修文否雙鴈聯翩忽蛻蟬

又

趙時成

九臯鳴鶴聞于天儀羽璫臺便上仙職世崇文今
一會華門屬望已多年蓮花大實將朝暮棣萼寒
霜奈後先報道故山旋路啓首卽情理自其然

又

權泳夏

文章此世有斯人六十平生一夢新太學芳名登
籍苑林園晚計絕畦畛邗知聖代還遺逸可惜高

才竟隱倫磊落風儀何處覲九臬寒月尚留神

又

李基東

堂堂義理大明家挺出奇男十丈霞天意分明需
世用騷壇鼓角萬人誇

三年大比榜花畿歲暮邨園上舍啣難力青雲知
有數居然世事太酸醎

逢場惜別每傾困巾角交情到老親雲院春花溪
野月風流文雅意中人

九天閶闔曉鐘悠泮舍相將數月畱何處得來如
許土西門立馬夕陽愁

又

李海鷹

無家句上貴家聲
臯鶴明窓太學生
置我意中先世誼
愛君名下故人情
文辭亦旣三冬足
步驟端宜萬里程
如遇薦賢許文正
青衿應不表丹旌

又

徐在愚

崇禎花葉一家春
文彩風流迥出塵
山岳鍾靈豪傑士
鄉邦倚重老成人
聲名滿世無通塞
氣數闕天育屈伸
六七十年膠輿漆
斷絃誰續獨傷神

同年同閨字相同
童中今成白髮翁
元白神交千載上
蘓黃落拓十年中
晚工收斂尋佳境
餘力提

斯發後蒙人物渺然公又去鵲山南北半如空

蠹死螢乾肘不離中年擺脫吐瑰奇大觀諸葛南

陽廟朗讀籠巖主海碑缺界多酸金橘味故山回

首臘梅枝滿腔風火消難盡天下英豪亦氣衰

輪蹄冠佩日繽紛法拂門壇博見聞量澗洪河能

止酒氣凌窮宙尚棲雲虎文死後方稱美鶴骨塵

間竟出羣未識何人銘有道南隣田叟自名耘

來詩披讀一潛然舊病關心只甲年星斗蟠胸魁

偉氣海山終曲寂寥篇小同留帶生階草阿邁先

寒泮沼蓮未了人間多少債也應歸訴玉京仙

數里分山惜別離張皇二十六篇詩天街五月揮
鞭去雪屋三冬病枕移好語寬懷直永訣浮生逢
着未前期暖風晴日西樓會把酒那堪少一悲

又

李庭德

徒步同登小白天坐看雲物兩茫然衰年幸得鵝
湖約道講齋中又一筵

人皆推髻我彈冠攀化依然別杏壇餘事文章華
國手去年携病出長安

臘月梅花淚滿腮美人消息幾時回九臯仙鶴雙
飛盡遺響淒然澈玉臺

又

李得魯

小白鬱嶢峴竹溪清瀾瀾鶴鳴九臯里中葉荒衰
移相居三舍地情契骨肉慈念昔崇禎老苦心痛
華夷大明天地世太白日月時是殷不是周一髮
與一髭宇宙一男子長嘯柰運非我公生此門貽
謨日孜孜資性天所厚躬踐樂不疑攜卷入蕭寺
孤燈是吾師沉瀝百家篇爬抉一理微一坐千篇
成兀兀不知疲興州文章窟巨匠爭所推淒切親
屈宋豪逸汗參維青雲如拾芥志業胡差池弱冠
枉林館幸接英邁儀非徒睦婣誼疊疊語常彞

妣老耄日我是髧髮兒雖幼聽古事汝家兼海遲
一門六七客痛矣靡孑遺東聞馬隆隆李叔來不
襲循落親借丁上山勞不彌忠簡埋標地與夫新
占知在殯幾多密幽宅風水禱曰最子孫多文筆
琅玕拔科業次第隨汝當能既資苟或好風吹勿
忘一毫絲而余瞻何知覲縷窮夕晞鳳樓寒泉集
瀛亭草川詩逢處相得樂百年好前期像貌甚堂
堂榮衛無小疵於乎上舍旌胡爲遽在茲甲子臨
院事修門仰有辭白雲推公先惟吾落後追西倉
泛樓船風利捷如椎花巖須吏過東門朝日隨黃

洋忽破碎傷人神憊羸公問何以處凝然不動其
公聞大笑戲冥然不知歸衛道誠拙薄只見鸞天
飛公言講鶴巢端拱互相諮九門五雲裏其奈長
掩曦愧我襲青襟哀君隔丹墀豈意唇頰痛竟成
千古悲興疾出國門有心不驚誰學文惟餘事戰
兢有所持時從牌拂席聞道以爲毗失弟旣如彼
失兄又如斯江月五更夜遺風何所之我疑孰爲
質我過孰爲規草長新阡土樹老古水湄鵝溪問
幾曲曲曲起悠思

又

李庭龍

憶昔同登小白高見君芝宇異凡曹興州第一風

流伴攜取香蔬與濁醪

無家有髮大明臣名祖風聲聳後人君亦古家奇

偉士縱橫今昔說津津

自許軒軒大丈夫後來歸宿是吾儒褒衣博帶相
逢地上面書腹不可誣

聞道西爲馱病歸青囊妙訣世間稀九臯老鶴尋
無處北望令人淚沾衣

又

權靖夏

胎禽唳九臯高亮掃啾嘈常恨未聞天遼陽倏遽

朝

欲說平生親轉頭跡已陳只將無限痛和淚送雙
輶

又

成鍾震

自少論心到六旬風流氣槩未全貧景瀛亭月無
邊夜小白山雲有主人夙計經營天下事暮年寥
落巷中塵更憐芳草丹陽路灑向鴟原淚滿巾

又

金輝蘊

修文今古誤才名聞道斯翁弟與兄泉下那埋堯
典策人間無愧郭碑銘西庠老矣違初志南土遽

然失主盟半世從遊皆往事斜陽不禁淚交橫

又

徐在懋

自洛行裝二豎侵六旬如瞥送光陰踪歸鶴出雲
輕重誼酌龜溪水淺深一代頗操文士柄百年空
絕故人琴適因痘警違攀綿悵望虛屏淚滿襟

又

申錫鼎

太白家聲逮我公寬仁剛毅復和融山南義理推
盟主林下窮居聽化翁自昔交遊先子畏如今邦
忍後生恫友于不以幽冥異兄弟相隨一歲中

又

李璣

南州人物轉蕭然
賴有白雲洞主賢
栗里清風曾
赫世
芥宮島選自英年
吾林政倚長城
屹泉路還
瑩大被連千里
陪遊渾似夢
後生無復拜床綠

又

金詰銖

老雲洪上舍歸路
白山高藝苑揮旗
屹蓬廬着脚
牢二難同遠逝
多士各奔號
有鷗天門迥
長鳴過
九臯

又

權重淵

冢世南陽十世餘
風流文雅耀先廬
所嗟荆璞當年
則光價何如
鼓鞀初

潦霽功名白首鑒明時重歎老藍鰲楊公有草
難逐百歲中間又胥接

晚計林園自縱時一方文教賴公持如今士抱龍
亡感挾丹遑遑迷所之

薇同咫尺是公家自昔偏蒙寄意遐從今欲向東
園去巷少居人感淚加

祭文

金重曾

顯顯惟靈晚杜賢裔璠璣正脉毓精鏹光性稟剛
明氣挺豪英文垣逸駕妙歲高驤屈宋權輿班馬
筋髓聲金佩玉厥詞采彰薄言采荷泮林增彩綵

綸館閣朝夕且升世好齊等我尋孫賦九臯溪處
老鶴翱翔清音未霄澗兮終日物外高致渾付詩
樽黨塾賢祠儒盟是主造我髦士抹批勒荒鑑藻
公平風流篤厚一方文獻振竭興頽雲鳥軒裳誰
得誰喪顧余前劣逐臭謬蒙早擬蓬麻晚仍蘿葛
矢言相仗以卒餘年云胡一朝壁宿遽晦鄭夢成
識郢斤增悲衿紳共歛我哀何極襄不臨壙祥闕
薦鴈辜負幽明實非始慮前甲既逆後會寧遲將
此滿腔以俟冥道替喉告訣哭不盡哀不昧者存
庶賜歆顧

又

金輝京

於乎古人有言曰一生一死交情可見夫交在於
心情形於外在心者吾可自知而形於外者他人皆
可得以見之矣若於死生之際無情之可見於外
者則其可曰交乎心乎於乎公與我交為何如也
青陽相遇白頭愈親公之所好我必好之我之所
惡公亦惡之平生契合泐然一出於心則其交之
爲莫逆吾二人固自知之審耳然而公今死矣我
其生矣其情當于何而見之也續息定而不得視
其飯重壚閉而不得執其紼周而一祭而又不得

一言告訣匆匆已七百有數旬而曾不若尋常村
里之人焉所謂他人之可得以見之者皆蔑矣人
謂我何公謂我何我其太上之忘情耶其具負之
矣自公之死惘然若郢斲之亡質牙撚之失期眞
坊慟怛結在心曲逝將貫幽顯而不滅則此乃交
之在心心發爲情交情之可見者然矣古人之言
其謂是耶於乎公挺生晚杜之家有文章氣節少
年梁楚僵走餘予步武芹宮華聞藉菟究其志業
若將有爲而畢竟與時抹殺未沾一命之增纔止
六旬之年天意又未可知也坐者之情乎何以爲

心也於乎炳心香灑心淚酌以一觴靈若有知尚
鑑余之心

又

徐在愚

山南傑士有韃雲翁簡亢高古實惟家風聰明剛
健天賦之豐人知不知皆曰知公知之深者惟此
愚蒙戚聯間井生並葉蓬竒談警句肇自成童初
年步趨綠駟跨空鞭恐先着瑟欲加工中晚落魄
拊鈕崆峒出入大方見聞廓充屈志損交與我磨
礱寧拙無巧寧坦無崇華聞日著廬興泮宮踈牙
著鬢已判窮通肥家孝友和氣洩融出門同人左

右憚懔於我信處責善謀忠剛柔相濟華實適中
清齋秉燭分寸効功洛建諸書通讀始終詩宗杜
陸賦埒廐雄間以月評百家類叢動輒鉅蛩離則
鱗鴻出或分謗入則開矇未始或異不必苟同士
生斯世惜我固窮肩墻斗室萍梗西東鵝溪溯洄
來往郵筒披雲斗闔瞻彼洛嵩馱病旋歸江漢孤
蓬眞元內鑠客氣上烘雖甚膠漆未分懷惻首邱
得正無憾于裏隣乏友輔鄉失棟隆墜我白首獨
立疲癯瞽將焉相飛不能狎環顧海內寂歷孤桐
中祥薄莫萬倍怔忡神之格思如見于躬

又

金樂近

於乎惟公資稟既異而充養有道內主於敬而行之以恕求諸身而身有餘教諸人而人易從博文強識誠好力究言有物而不越乎六經行有常而措之於一身蘊之爲德行發之爲文辭蔚然爲嶠南士林之翹楚南州之學者未能或之先也意謂芹宮桂籍自在分內而次第拾取大有施爲之望矣奈之何命道蹉跎屢屈禮闈晚獲司馬之名被公豈足爲安於小成耶自是以來稍謝名途飽居盤阿將爲晚年菟裘殆古人所謂隱者之所盤旋

而取之耶遂營數椽茅棟於止山數武地蓋從學者之爲公棲息之所也圖書滿壁編帙盈架茅簷之下風月無邊菊籬之間花竹秀野暇日尋芳陪侍杖屨執經問難征邁日月茶飯先賢之格言花酒古人之詩篇一日二日而不厭不倦者六年於茲矣於乎事與心違命與時舛人生離合亦自有數而况師友講習豈徒偶然哉旋返鶴臬復僛鵠湖自茲以後軒屏之進候間澗杖屨之賁惠亦稀然而嚮仰之誠垂眷之意豈渺於前日同里之時也吾道南爲公議西征偶以嗽石之症漸成膏火

爍將辭旅館肩舁南下自春徂冬每每診候慰以
翼日之漸瘳則公亦爲然而甲子詩在枕上矣手
以指之且以諷之曰句語平穩筆力適勁我非溢
然於時月之人也左右聞此驚喜交極小子還巢
私自語心曰味其句語則優哉遊哉之意有平日
定力庶望神明之扶護矣那意野書忽報於旬日
之半哉月纔圓缺兩仲蘓長老亦如晨星之零落
天胡不慙一至於此歸視雲齋蒲瀝虛亭巋然若
靈光之獨存矣小子後生更於何而考德而問業
也丹旒催發素帷冥冥荒詞告訣物薄誠切尚冀

英靈庶歆來思

又

徐在正

伏惟尊靈晚杜家學大明舊族太白華閭趾美承
緒世有碩德猗歟我公克紹前烈天姿篤厚充以
學力論議峻整器量宏廓謁謁春溫落落霜傑步
趨既正採履愈確博以說約和不流俗義理之判
如辨黑白早就有道坪門立雪功磬磨礱益拓規
矱憲堵顏瓢講論不撤悅我芻豢如嗜菽粟華國
文章明時黼黻重違遠教俯首塲屋輒居前列發
必中疊晚年沿壁豈盡蘊蓄爰及賢咸登庠繼迹

退坐邱園討論經籍墳簞迭唱隨遇相適臯塾詠
菊梨齋看竹左圖右書仰思俯讀朱退遺則瀟洛
要訣固窮安分守一處獨無意名利樂我泉石公
議漠然干旄不予世道之望非公之屈董率一方
斐然多作獎進鄉髦苑有矜式惟時小子優蒙拂
拭夏做冬課指路單的操几黌舍握衣京洛戎以
字叙尤加警惕有所拘嫌遵行未得居在隣比枉
屈昕夕家君命酒小子掃席永期百年邦意今日
千里興茂八朔沈劇嶠南運否奄然易簣斯文望
絕吾黨氣塞丹翁絀逝未間一月稍慰哀胤咸曰

式穀宿崇差減伏想陰騭周祥已啓典型表慰邈荒
辭告訣敢薦澗酌化惟尊靈庶賜歆格

又

從子稷厚

我家南來世篤先休幾圯于中累經堊海亦粵王
考隻手扶厦積仁累義篤生府君天姿卓越鳳立
鷄羣風流簡亢修竹千仞言辭條暢蠹如洪鍾就
之淵潏望若山重弱齡文垣僂走籍湜早登法門
親承旨訣傍治舉業俯首場屋豈徒立揚承順親
志魚目渾真累刑和寶自泣風樹念絕名塗晚遊
芹宮冠蓋傾洛鶴鳴于臯若將聲徹命與時遠薄

言尋初梨山之陽爰卜菟裘圖書滿壁花竹盈砌
朝評水石夜誦箴銘間速賓朋迭盞壺觴于于鼓
篴一方幘幘爰及吾父塏簷迭唱出必聯筇入則
同被中緣棲肩朝東暮西看雲之什在在箱笥客
歲叫閭輿疾南歸八朔沈綿遽至呼臬天割吾家
胡寧至此襄樹未畢先人捐背不肖無似質劣才
疎樂有賢父庶無大謬旬月之間奄哭二父冥頑
視息尚此寄世長城頽矣外侮誰禦砥柱傾矣洪
濤若何每對從兄不言而涕稍俟神定撰次行略
求諸秉筆傳之千億靈如有知庶憐衷曲

老雲文集卷之六終

輝濬少時頗聞汝南評興州之士老雲洪公爲巨
擘焉公杜谷先生之后也蓋其遺風餘韻固自有
所傳瓌材博學妙年已立幟賈壘聘塲屋汗籍湜
莫之或先吾族兄山淵公以詞賦雄於世於公先
進而每稱之爲可畏然而終落魄有命存焉爾公
其有見於此乎及才小成不復爲進取計逝老雲
林乃等室於梨陽日靜坐玩經史以教授生徒或
良辰雅集閑居勝賞輒以詩自娛凡四五七言古
律千有餘首近體則豪放慷慨全學劍南和淵明
及陶山雜詠皆平澹蕭散亦頗得其意趣其文不

甚多寧多醇雅而若辨辭等諸篇尤可見晚來用
工之深有非工令中人所能到也平生著述寔不
止此歿後十許年殆盡亡佚公之胤鍾厚甫夙有
資志文藝足以紹修而不幸早逝從子稷厚門人
金輝爽相與蒐輯若干而稷厚甫又不幸輝頭顱
其終泯遂與稷厚子學裕鍾厚子晉裕兄弟圖所
以繡傳其須皆輝爽自擔拮据以庀之者也益裕
來屬不佞以正承亥刪繁複彙為三編不佞晚生
孤陋不獲從公遊意以時人所傳誦者為至矣今
乃得斯文而讀之所知於前日者更覺淺陋也孟

予曰誦其詩讀其書不知其人可乎後之人觀於是集亦可以知公之爲人也因盥手而爲之書監役宣城金輝濬謹跋

歲壬辰老雲先生上舍公遺集成於乎公平日所著述豈不止此棲屑之中散佚不收獨詩若文若干卷在此特全鼎之一齋惜哉公下世之後從學之士謀所以壽其傳斥書塾廢材又各出力逐年拮据今已二十九年而當時之人多零落存亦衰廢金斯文輝爽甫體其先人之志與公之從孫學裕合謀敦幹募活字繡印于檜石書堂閱月而功告

訖旣而諸賢以余在門孫之列請一言以尾之余
曰公之言行大致人已耳目之其寄諸文章者非
集無以傳諸賢之功豈不偉哉然余切有所感公
德宇深重才氣英穎自幼篤學已有近裏向上底
意而念家世屈親命早治舉業颺聲於場屋戊申
始登庠遂慨然回車筭小齋左右圖書俯讀仰思
期有實得觀於下解諸篇可見其用工之篤大蓄
無施卒老作窮廬一上舍斯豈非後生之遺憾也
歟雖然河汾之間有晉鄙之薰紫蓋南北青襟濟
濟則公之學固可謂行於一方而是集之傳亦將

不朽於百世之下矣若夫威勢赫而埋沒了後世
篇帙博而不足以嘉惠來人則不可與籠總論也
其得失後之人有能辨者也玄戰執徐劫月下浣
族孫鍾善謹識

